



GLION



Lea Suter presidescha l'union Forum per la cultura da pasch.

FOTOS AUGUSTIN BEELI

Proxim «Ilanzer Sommer»

L'union **Forum per la cultura da pasch** ei vidlunder da planisar la secunda ediziun dall'occurrentza «**Ilanzer Sommer**». Gl'ost digl onn vargau haveva ella organisau quella l'emprema gada. La presidenta **Lea Suter**, ensemen cun ina comite local e naziunal, haveva purschiu in simposi tematic d'ina jamna cun referats, ateliers, guidadas, discussiuns el plenum ed in program accumpignont.

Nostalgia per la pasch

Dils 7 tochen ils 13 d'ost 2022 ei la proxima «stad da Glion». Dacuort ha il Forum publicau ina brev electronica e distribuui quella ad interessents e participonts dall'emprema occurrentza. «Dapi che nus havein entschiet a planisar la 'stad da Glion' ei bia semidau. La noziun dalla cultura da pasch ha gudignau rasantamein impurtonza ed urgenza», scriva **Lea Suter** ella newsletter. Ella fa allusiun all'actualitad. Inagada ei quei la situaziun ch'il pussent president russ *Wladimir Putin* havess mustgas d'occupar militaricamein il stadi vischinont Ucraina. L'Europa fa tut ils sforzs da cultivar cun diplomazia la pasch.

Sin plaun internaziunal dat ei tensiuns geopoliticas, enten dumnignar la crisa da corona carschevan las animositads denter carstgauns buca virolai e persunas viroladas. En vesta a quellas pintgas e grondas brasclas e burnidas appellescha **Lea Suter** da clamar anavos la pasch. «Aschi ditg ch'ei dat negin che pretenda la pasch, vegn ei buca a dar pasch», hagi gl'activist armenian Georgi Vanyan postulau onn vargau. Daferton ei quel morts ed il mund hagi piars ina impurtonta vusch globala da pasch, scriva l'activista svizra. «Nus vulein purtar anavos la voluntad da far pasch e la nostalgia per la pasch», ei sia pretensiuin. Gia el mingagi d'in e scadin sappien ins tgirar quei spért, ellas societads ed uniuns, al plaz da lavur ed ellas relaziuns naziunalas ed internaziunalas. Avon che mussar cul det sin auters e da render attent ad obligaziuns da tshels, stoppien ins entscheiver a s'occupar



cugl agen potenzial.

Project da chor

Il detagls dil program dalla «stad da Glion» dils 7 tochen ils 13 d'ost 2022 ein aunc buca enconuschents. Ei dat perinagada puspei rodund 30 occurrenzas da tut gener ella **claustra dallas so-ras dominicanas** ed el marcau da Glion. In element niev ch'il **Forum per la cultura da pasch** porta ei in project da chor. Il project «Leh Ya Jarè» per chor, ensemble oriental ed improvisaziun, orgla e DJ meinan *Rilana Cadruvi* e *Flavia Walder*.(fmr/abc)

Dapli informaziuns mira www.chorinterkultur.com e www.forumfriedenskultur.ch.



Discutar dalla pasch, sut il tetg dalla claustra.